

四庫全書

子部

欽定四庫全書

喻林卷九十九

明 徐元太 撰

政治門 四

賞罰

火在天上大有君子以遏惡揚善順天休命

易大有

訟言終朝晉言一晝俱不盡一日明黜陟之速所以示

懲勸也

周易正義

天有命有禍有福人有醜有紕絕有斧鉞以人之醜當

天之命以紕絕當天之福以斧鉞當天之禍

汲冢周書
命訓解

明主醲於用賞約於用刑

後漢書
馬援傳

受堯誅者不能無怨受桀賞者不能無慕此人情也

吳志

孫皓
傳註

懸爵於朝而有功者必縻其賞懸刑於市而有罪者必

惟其辜

魏書高
祖上紀

治斧鉞者不敢讓刑治軒冕者不敢讓賞墳然若一父

子若一家之實義禮明也

管子君
臣下

春夏生長秋冬收藏四時之節也賞賜刑罰主之節也

四時未嘗不生殺也主未嘗不賞罰也

管子形勢解

王者刑九賞一強國刑七賞三削國刑五賞五

商子去強

明君之行賞也暖乎如時雨百姓利其澤其行罰也畏

乎如雷霆神聖不能解也

韓非子主道

善之生如春惡之死如秋故民勸極力而樂盡情

韓非子守

道

賞罰之為道利器也君固握之不可以示人若如臣者

猶獸鹿也惟薦草而死

韓非子內
儲說上

賞罰者利器也君操之以制臣臣得之以擁主故君先見所賞則臣鬻之以為德君先見所罰則臣鬻之以為威故曰國之利器不可以示人

韓非子內
儲說下

延陵卓子乘蒼龍桃文之乘鉤飾在前錯鍍在後馬欲進則鉤飾禁之欲退則錯鍍貫之馬因旁出造父過而為之泣涕曰古之治人亦然矣夫賞所以勸之而毀存焉罰所以禁之而譽加焉民中立而不知所由此亦聖

人之所為泣也

韓非子外
儲說右

夫必恃自直之箭百世無矢恃自圜之木千歲無輪矣
自直之箭自圜之木百世無有一然而世皆乘車射禽
者何也隱括之道用也雖有不恃隱括而有自直之箭
自圜之木良工弗貴也何則乘者非一人射者非一發
也不恃賞罰而恃自善之民明主弗貴也何則國法不
可失而所治非一人也

韓非子
顯學

武王問太公望曰吾欲少閒而極用人之要望對曰賞

如山罰如谿

尉繚子
兵教

民無道知天民以四時寒暑日月星辰之行知天四時
寒暑日月星辰之行當則諸生有血氣之類皆為得其
處而安其產人臣亦無道知主人臣以賞罰爵祿之所
加知主主之賞罰爵祿之所加者宜則親疎遠近賢不
肖皆盡其力而以為用矣

呂氏春
秋當賞

夫登山而視牛若羊視羊若豚牛之性不若羊羊之性
不若豚所自視之勢過也而因怒於牛羊之小也此狂

夫之大者狂而以行賞罰此戴氏之所以絕也

呂氏春秋壅塞

為君虛心靜處聰聽其響明視其形以行賞罰之象其

行賞罰也響清則生清者榮響濁則生濁者辱影正則

生正者進影枉則生枉者絀

春秋繁露保位權

人君秋賞則溫夏罰則寒

王充論衡感虛篇

夫賞罰之於萬民猶轡策之於駟馬也轡策不調非徒

遲速之分也至於覆車而摧轅賞罰之不明也則非徒

治亂之分也至於滅國而喪身可不慎乎

徐幹中論賞罰

天地之道不能純仁故青陽闡陶育之和素秋厲肅殺之威融風扇則枯瘁摠藻白露凝則繁英彫零是以品物阜焉歲功成焉溫而無寒則蟬動不蟄根植冬榮寬而無嚴則姦宄並作利器長守故明賞以存正必罰以閑邪勸沮之器莫此之要

抱朴子外篇用刑

毫釐蹉於機則尋常違於的與奪失於此則善否亂於彼邪正混侔則彝倫攸斁功過不料則庶績以崩故明君賞猶春雨而無霖淫之失罰擬秋霜而無詭時之嚴

抱朴子外

篇廣譬

二儀不能廢春秋以成歲明主不能舍刑德以致治

抱朴

子外篇

廣譬

賞罰者國之利器而制人之柄也故天以晷數成歲國

以法教為治晷運於天則時成於地法動於上則治成

於人晷之運也先春後秋法之動也先賞後罰

劉子
賞罰

溫風發春所以動萌華也寒露降秋所以殞茂葉也明

賞有德所以勸善人也顯罰有過所以禁下姦也

劉子
賞罰

賞信而罰明則萬人從之若舟之循川車之遵路亦奚

向而不濟何行而弗臻矣

劉子賞罰

春秋不以善惡殊其彫榮人君不以貴賤革其賞罰

文選

陸士衡連珠註

無賞罰之君而欲世治猶不事梳櫛而求髮治不可得

也

意林正論

行賞不洽於是春半半生也行罰不威是秋半半死

也半生之春不洽於人半死之秋不專於義

太平御覽治道部賞

賜

歲為善星不福無道火為罰星不罰有德

困學紀聞
卷六春秋

號令

天下有風姤后以施命誥四方

易姤

隨風巽君子以申命行事

易巽

九五渙汗其大號渙王居无咎

易渙

民之犯令告之已終更復從始告之慤勤不已若天之

行四時既終更復從春為始

周易正義

甲為十日之首創造之令為在後諸令之首故以創造之令謂之為甲故漢時謂令之重者謂之甲令

周易正義

或宣威以肅震曜或敷和而散風雨得之則百度惟貞失之則千里斯謬樞機之發榮辱之主絲綸之動不可

不慎

尚書正義序

天無大雨則歲不熟而幼弱者饑猶國之無政令則天

下民困病矣

鄭氏箋詩候人

召南大夫以王命施號令於四海猶雷殷殷然發聲於

山之陽

鄭氏箋詩
殷其雷

言殷殷然雷聲在南山之陽以喻君子行號令在彼遠

方之國

毛氏正義
殷其雷

雨從上而下於地猶教令從王而下於民而王之教令
衆多如雨然事皆苛虐情不恤民而非所以為政教之

道故作此詩以刺之名之曰雨無正

毛詩正義
雨無正

風氣動聖人以宣號令

三墳
氣墳

夫水激而流渠令疾而物重先王理其號令之徐疾內

守國財而外因天下矣

管子地數

天以時為權地以財為權人以力為權君以令為權

管子

山權

數

父之於子也令有必行者有必不行者去貴妻賣愛妾此令必行者也因曰汝無敢恨汝無敢思令必不行者也故為人上者必慎所令

尹文子大道下

家君發憲布令其家曰若見愛利家者必以告若見惡賊家者亦必以告若見愛利家以告亦猶愛利家者也

上得且賞之衆聞則譽之若見惡賊家不以告亦猶惡賊家者也上得且罰之衆聞則非之是以徧若家之人皆欲得其長上之賞譽辟其毀罰是以善言之不善言之家君得善人而賞之得暴人而罰之善人之賞而暴人之罰則家必治矣然計若家之所以治者何也唯以尚同一義為政故也家既已治國之道盡此已邪則未也國之為家數也甚多此皆是其家而非人之家是以厚者有亂而薄者有爭故又使家君總其家之義以尚

同於國

墨子尚
同下

言不相聞故為之金鼓視不相見故為之旌旗夫金鼓

旌旗者所以一人之耳目也

孫子
軍爭

奔車之上無仲尼覆舟之下無伯夷故號令者國之舟

車也安則智廉生危則爭鄙起

韓非子
安危

且父母之所以求於子也動作則欲其安利也行身則
欲其遠罪也君上之於民也有難則用其死安貧則盡
其力親以厚愛關于於安利而不聽君以無愛利求民

之死力而令行

韓非子
六反

舜使吏決鴻水先令有功而舜殺之禹朝諸侯之君會稽之上防風之君後至而禹斬之以此觀之先令者殺

後令者斬則古者必貴如令矣

韓非子
飾邪

吳起與秦戰未合一夫不勝其勇前獲雙首而還吳起立斬之軍吏諫曰此材士也不可斬起曰材士則是矣非吾令也斬之

尉繚子
武議

君者民之心也民者君之體也心之所好體必安之君

之所命民必從之

春秋繁露為人者天地

號令發而萬物生焉雷風行而四方齊也

京氏易傳上

鼓舞萬物者其雷風乎鼓舞萬民者其號令乎雷不一

風不再

揚子先知

言風起而草木之類搖動君令下而百姓之化行也

王逸

註楚辭九章

觀號振振

音真

醜牲牲

音萃

森朱于并

音芥

風風

音休

盪

他浪切

于垠

傳曰號振振令之發也醜牲牲衆之多也森朱于并木

之茂也。颶盪于垠，風之行也。昔王由是施，乃令布乃下。

以省爾萬方，以化爾兆民。俾風教大行，泉音率土咸順。

元包
太陽

天以雷風鼓舞萬物，君以號令制御萬民。楊子法言
註先知篇

風者天之號令，雲雨者天之膏澤。故聲教與風皆翔恩。

澤與雲俱行。李善註文
選東京賦

易曰：渙汗其大號，言號令如汗。汗出而不反者也。今出

善令，未能踰時而反，是反汗也。補文選劉向
災異封事

魯燒積澤天北風火南倚恐燒國哀公懼自將衆趣救
火左右無人盡逐獸不救火乃召問仲尼仲尼曰夫逐
獸者樂而無罰救火者苦而無賞此火所以不救也事
急不及以罰救火者盡賞之則舉國不足以賞於民請
從行罰乃下令曰不救火者比降北之罪令下未遍火

已滅矣

藝文類聚
火部火

蔡邕封事曰風者天之號令所以教人

玉海天文
天文書上

雷動物之氣也雷之發聲猶人君出政教以動國中之

人也

玉海周易
鄭康成注

禮樂

樂之隆非極音也食饗之禮非致味也清廟之瑟朱絃

而疏越壹唱而三歎有遺音者矣大饗之禮尚玄酒而

俎腥魚大羹不和有遺味者矣

禮記
樂記

土敝則草木不長水煩則魚鼈不大氣衰則生物不遂

世亂則禮慝而樂淫

禮記
樂記

禮云禮云玉帛云乎哉樂云樂云鐘鼓云乎哉

論語
陽貨

清廟之瑟朱絃而疏越一唱而三歎有進乎音者矣大饗之禮上玄尊而俎生魚大羹不和有進乎味者矣故先王之制禮樂也非特以歡耳目極口腹之欲也將教

民平好惡行禮義也

呂氏春秋適音

有虞氏之祀其社用土祀中雷葬成畝其樂咸池承雲九韶其服尚黃夏后氏其社用松祀戶葬牆置翬其樂夏籥九成六佾六列六英其服尚青殷人之禮其社用石祀門葬樹松其樂大濩晨露其服尚白周人之禮其

社用栗祀竈葬樹栢其樂大武三象棘下其服尚赤禮

樂相詭服制相反而皆不失親疎之恩上下之倫

淮南

子齊
俗訓

天生之以孝悌地養之以衣食人成之以禮樂三者相

為手足合以成體不可一無也

春秋繁露
立元神

聖人之治天下也礙諸以禮樂無則禽異則貉

楊子
問道

或曰太古塗民耳目惟其見也聞也見則難蔽聞則難

塞曰天之肇降生民使其目見耳聞是以視之禮聽之

樂如視不禮聽不樂雖有民焉得而塗諸

楊子問道

禮兵之紀也樂兵之精也其紀如梯其精如醴故禮以

制其容樂以導其氣

天祿閣外史問兵

經營宮室立城郭然後知幹楨之能有所立也建宗廟

立社稷然後知禮樂之能有所成也

楊子法言注五百篇

弓良在檟格人良在禮樂

楊子法言注五百篇

渡大海在舟船興大治在禮樂

楊子法言注寡見篇

齊禮

上天下澤履君子以辯上下定民志

易履

生之樂之則母之禮也政之教之遂以成之則父之禮

也父母之禮以加于民

汲冢周書
本典解

相鼠刺無禮也

毛詩
相鼠

野有死麕惡無禮也

毛詩野
有死麕

桑扈刺幽王也君臣上下動無禮文焉

毛詩
桑扈

蒹葭刺襄公也未能用周禮將無以固其國焉

毛詩
蒹葭

芄蘭刺惠公也驕而無禮大夫刺之

毛詩
芃蘭

大車刺周大夫也禮義陵遲男女淫奔故陳古以刺今

大夫不能聽男女之訟焉

毛詩大車

柯斧柄也禮義者亦治國之柄

毛詩伐柯注

媒所以用禮也治國不能用禮則不安

毛詩伐柯註

楊木之舟浮於水上汎汎然東西無所定舟人以紼繫

其綏以制行之猶諸侯之治民御之以禮法

鄭氏箋詩采菽

匏有苦葉不可食濟有深涉不可渡以興禮有禁法不

可越

毛詩正義匏有苦葉

若過深水則厲淺水則褰衣過水隨宜期之必渡以興用
禮當隨豐儉之異若時豐則禮隆時儉則禮殺遭時制宜
不可無禮若其無禮將無以自濟

毛詩正義
匏有苦葉

蒹葭之草蒼蒼然雖盛未堪家用必待白露凝戾為霜然
後堅實中用歲事得成以興秦國之民雖衆而未順德教
必待周禮以教之然後服從上命國乃得興

毛詩正義
蒹葭

鸛鳴能言不離飛鳥猩猩能言不離禽獸今人而無禮雖
能言不亦禽獸之心乎夫惟禽獸無禮故父子聚麀是故

聖人作為禮以教人

禮記曲禮上

夫禮者自卑而尊人雖負販者必有尊也而況富貴乎

禮記

曲禮上

故禮之於人也猶酒之有藥也君子以厚小人以薄

禮記禮運

經禮三百曲禮三千其致一也未有入室而不由戶者

禮記禮器

禮也者猶體也體不備君子謂之不成人設之不當猶不

備也

禮記禮器

誦詩三百不足以一獻一獻之禮不足以大饗大饗之

禮不足以大旅大旅具矣不足以饗帝毋輕議禮

禮記禮器

曾子曰周禮其猶醯與

禮記禮器

禮之於正國也猶衡之於輕重也繩墨之於曲直也規矩之於方圓也故衡誠縣不可欺以輕重繩墨誠陳不可欺以曲直規矩誠設不可欺以方圓君子審禮不可

誣以奸詐

禮記經解

夫禮禁亂之所由生猶坊止水之所自來也故以舊坊為無所用而壞之者必有水敗以舊禮為無所用而去

之者必有亂患

禮記
經解

室而無奧阼則亂於堂室也席而無上下則亂於席上

也車而無左右則亂於車也行而無隨則亂於塗也立

而無序則亂於位也

禮記仲
尼燕居

君子之道辟則坊與坊民之所不足者也有人為之坊民

猶踰之故君子禮以坊德刑以坊淫命以坊欲

禮記
坊記

醴酒在室醕酒在堂澄酒在下示民不淫也

禮記
坊記

君不稱天大夫不稱君恐民之感也詩云相彼盍旦尚

猶患之

禮記坊記

月者三日則成魄三月則成時是以禮有三讓建國必

立三卿

禮記鄉飲酒義

猶襄陵之浸修隄防以制之方用切駕之馬設銜策以

驅之故乃上法圓象下參方載道之以德齊之以禮禮記

正義

序

人君治國須禮如巧匠治物執斤斧之柄

禮記正義禮運

禮義以為器可耕於人情人情得禮義之耕如田得耒

耜之耕也

禮記正義禮運

農夫之田用耒耜以耕之和其剛柔聖人以禮耕人情

正其上下

禮記正義禮運

視鼠有其形體人亦有其形體鼠無禮故賤人有禮故

貴若人而無禮何異於鼠鼠之無禮不能損害人之無

禮傷害更多

禮記正義禮運

人情備德由於有禮譬如竹箭四時蔥翠由於外有筠

也

禮記正義禮器

禮之於政如熱之有濯也濯以救熱何患之有

左傳襄公三十

一年

男子之贄羔鴈雉牯婦人之贄棗栗鰒修

穀梁莊公二十四年

怠慢於禮則政無車無車則政不行

春秋正義襄公二十一年

閨門之內具禮矣乎嚴父嚴兄妻子臣妾猶百姓走役

也

孝經

治國而無禮譬猶瞽之無相俵俵乎何所之譬猶終夜有求於幽室之中非燭何以見故無禮則手足無所措

耳目無所加進退揖讓無所制

孔子家語論禮

夫寒熱晦明所以為歲尊卑奢儉所以為禮故以晦明

寒暑之氣尊卑侈約之禮為其節也

後漢書荀淑子史傳

夫勇多則弑其君力多則弑其長然而不敢者維禮之

謂也禮者所以御民也轡者所以御馬也

晏子春秋諫上

文禮之野與禽獸同則言語之暴與蠻夷同謂

鷦冠子著希

水行者表深使人無陷治民者表亂使人無失禮者其

表也先王以禮表天下之亂今廢禮者是去表也

荀子大略

繩墨誠陳矣則不可欺以曲直衡誠縣矣則不可欺以輕重規矩誠施矣則不可欺以方圓君子審於禮則不可欺以詐偽故繩者直之至衡者平之至規矩者方圓之至禮者人道之極也

荀子禮義

公輸不能加於繩聖人莫能加於禮

荀子法行

禮者人主之所以為羣臣寸尺尋丈檢式也人倫盡矣

荀子儒效篇

人之所以為人者非特二足無毛也以其有辨也今夫

猩猩形笑亦二足而毛也然而君子啜其羹食其馘故人之所以為人者非特以其二足而無毛也以其有辨

也

荀子非相篇

尋常之室無奧剝之位則父子不別六尺之輿無左右之義則君臣不明尋常之室六尺之輿處無禮即上下躋逆父子悖亂而況其大者乎

賈子新語禮

螟蠶一歲再收非不利也然而王法禁之者為其殘桑也離先稻熟而農夫耨之不以小利傷大穫也家老異

飯而食殊器而享子婦跪而上堂跪而斟羹非不費也
然而不可省者為其害義也待媒而結言聘納而娶婦
紱綬而親迎非不煩也然而不可易者所以防淫也

淮南

子泰
族訓

在天者莫明乎日月在地者莫明乎水火在人者莫明
乎禮義故日月不高則所照不遠水火不積則災災不
博禮義不加乎國家則功名不白故人之命在天國之

命在禮

韓詩
外傳

河決若甕口而破千里況禮決乎其所害必多矣

鹽鐵論申

韓

堤坊成而民無水菑禮義立而民無亂患故禮義壞堤

坊決所以治者未之有也

鹽鐵論
論誅

夫禮讓爲國者若江海流彌久不竭其本美也苟爲無

本若蒿火暴怒而無繼其亡可立而待

鹽鐵論
誅秦

或問太古德懷不禮懷嬰兒慕駒犢從焉以禮曰嬰犢

乎嬰犢母懷不父懷母懷愛也父懷敬也獨母而不父

未若父母之懿也

揚子問道

允治天下不待禮文與五教則吾以黃帝堯舜爲疣贅

揚子問

道篇

見弓之張兮弛而不失其良兮曰檠之而已矣川有防

器有範見禮教之至也經營然後知幹楨之克立也

揚子

五
百

或問禮難以彊世曰難故彊世如夷俟倨肆羈角之哺

果而啗之奚其彊

揚子五百篇

次四牽羊示于叢社執圭信其左股野測曰牽羊于叢

不足勞也

太元經
第五聚

使童子變孟賁之意孟賁怒之童子操刃與孟賁戰童

子必不勝力不如也孟賁怒而童子修禮盡敬孟賁不

忍犯也

王充論衡
非韓篇

天秩有不遷之常尊無禮猶犯端死之重刺是以玄洲

之禽獸雖能言而不得廁貴姓蛭蛭之負麗雖寄命不

得爲仁義

抱朴子外
篇博喻

蓋人之有禮猶魚之有水矣魚之失水雖暫假息然枯

糜可必待也人之棄禮雖猶醜然而禍敗之階也

抱朴子外

篇識

無禮則國不立故謂之幹無敬則禮不行故比之於輿

前漢書註

五行志

川防禁溢器範檢形以喻禮教人之防範也

揚子法言註五百篇

貪者難爲惠苛煩者難爲恭君子以禮而已矣

太平御覽人事

部

人之所以貴者以其節也人而無禮者其獼猴乎雖人

象而蟲質也

初學記獸部猴註

禮若亢鋸之柄亢舉也禮有所斷割猶舉鋸之柄以斷

物也

困學紀聞卷十諸子

和樂

雷出地奮豫先王以作樂崇德殷薦之上帝以配祖考

易豫

清明象天廣大象地終始象四時周還象風雨

禮記樂記

歌者上如抗下如隊曲如折止如橐木倨中矩句中鉤

累累乎端如貫珠

禮記樂記

歌者在上匏竹在下貴人聲也

禮記郊特牲

善樂感人則人化之爲善惡樂感人則人隨之爲惡是樂出於人而還感人猶如雨出於山而還雨山火出於

木而還燔木

禮記正義樂記

治國雖聚仁若不奏樂和之則仁心不堅如農夫雖聚

穀而不食則甘穀空失也

禮記正義禮運

聲亦如味一氣二體三類四物五聲六律七音八風九

歌以相成也清濁大小短長疾徐哀樂剛柔遲速高下

出入周疏以相濟也君子聽之以平其心

左傳昭公二十年

端如貫珠清同叩玉

史記樂書

知聲而不知音者禽獸是也知音而不知樂者衆庶是

也惟君子爲能知樂

史記樂書

亦各一世之化度時之樂何必華山之騷耳而後行遠

乎

史記樂書

夫治國家而弭人民又何爲乎絲桐之間騶忌子曰夫大弦濁以春溫者君也小弦廉折以清者相也攫之深而醜之愉者政令也鈞諧以鳴大小相益回邪而不相害者四時也夫復而不亂者所以治昌也速而徑者所以存亡也故曰琴音調而天下治

史記田
完世家

昔諸侯倦於聽治息於鐘鼓之樂士大夫倦於聽治息於竽瑟之樂農夫春耕夏耘秋斂冬藏息於聆正之樂今夫子曰聖王不爲樂此譬之猶馬駕而不稅弓張而

不弛無乃非有血氣者之所不能至邪

墨子
三辯

樂之有情譬之若肌膚形體之有情性也有情性則必

有性養矣

呂氏春
秋侈樂

世之人主多以珠玉戈劒爲寶愈多而民愈怨國人愈

危身愈危累則失寶之情矣亂世之樂與此同

呂氏春
秋侈樂

爲木革之聲則若雷爲金石之聲則若霆爲絲竹歌舞

之聲則若譟以此駭心氣動耳目搖蕩生則可矣以此

爲樂則不樂

呂氏春
秋侈樂

耳之情欲聲心不樂五音在前弗聽目之情欲色心弗樂五色在前弗視鼻之情欲芬香心弗樂芬香在前弗嗅口之情欲滋味心弗樂五味在前弗食欲之者耳目鼻口也樂之弗樂者心也

呂氏春秋適音

民至於焦脣沸肝有今無儲而乃始撞大鐘擊鳴鼓吹竽笙彈琴瑟是猶貫甲冑而入宗廟被羅紈而從軍旅

失樂之所由生矣

淮南子主術訓

夫樂至于娛心而後和和而後化干羽格苗鳳皇儀韶

淫魚聽瑟孟嘗泣琴豈耳目所能感哉

天祿閣外史樂論

和之以心暢之以八音如春陽之鼓萌藥時雨之沐萬

物此之謂娛心之樂

天祿閣外史樂論

夫樂本心術故響浹肌髓先王慎焉

文心雕龍樂府

聲之慷慨如壯士澎湃波浪相激之聲

李善註文選洞簫賦

夫咸池六英所以陳清廟協神人也鄭衛之樂所以娛

密坐接歡欣也

文選舞賦

夫其淒唳辛酸嚶嚶關關若離鴻之鳴子也含嘲譁諧

雍雍喈喈若羣雛之從母也

文選
笙賦

和聲之感人心亦猶酒醴之發人情也

廣文選嵇叔夜
聲無哀樂論

音聲之作其猶臭味在於天地之間其善與不善雖遭遇濁亂其體自若而不變也豈以愛憎易操哀樂改度

哉

廣文選嵇叔夜
聲無哀樂論

假使鹿鳴重奏是樂聲也而今感者遇之雖聲化遲緩但當不能使變令歡耳何得更以哀耶猶一爝之火雖未能溫一室不宜復增其寒矣夫火非隆寒之物樂非

增哀之具也

廣文選嵇叔夜聲無哀樂論

桓溫問孟嘉曰聽伎絲不如竹竹不如肉何謂也答曰

漸近自然

事文類聚歌

黃帝會羣臣於太山作清角之音似兩鳳之雙鳴若二

龍之齊吟如丹蛇之翹首似雄雉之帶矢

太平御覽兵部角

孔子至齊郭門之外遇一嬰兒擊一壺相與俱行其視

精其心端孔子謂御曰趣駢之韶樂方作故樂不獨自

樂又以樂人非獨以自正也又以正人

太平御覽樂部雅樂下

簫韶者舜之遺音也溫潤以和似南風之至其為音如
寒暑風雨之動物如物之動人雷動禽獸風雨動魚龍

二儀動君子財色動小人

太平御覽皇王
部帝舜有虞氏

伊耆有葦籥之音伏羲有網罟之詠葛天八閔神農五

絃事與功偕其來尚矣


玉海音
樂樂

唐虞之世樵夫牧豎擊轅中韶感於和也班固集擊轅

相杵亦足樂也曹子建書擊轅之歌有應風雅

因學紀
聞卷十

七評
文



喻林卷九十九

欽定四庫全書

子部

喻林卷一百一

詳校官中書

臣朱文翰

主事

臣祁韻士覆勘

總校官原任中允

臣王燕緒

校對官中書

臣朱炘

謄錄監生

臣李學瞻

欽定四庫全書

喻林卷一百

明 徐元太 撰

政治門 五

操約

度日出日入以知東西南視定北準極以正南北

毛詩定之

方註

楨幹者皆以築牆為喻幹是牆之主善政亦民之主也

毛詩正

義桑扈

室中度以几堂上度以筵宮中度以尋野度以步涂度

以軌

周禮考工記

夫解雜亂紛糾者不控捲救鬪者不搏撻批亢擣虛形

格勢禁則自為解耳

史記孫吳傳

銖銖而稱之至石必差寸寸而度之至丈必過石稱丈

量徑而寡失

前漢書枚乘傳

射人將發矢必先於此儀之發則中於彼矣君將出政

亦先於朝廷度之出則應於民心

後漢書志五行五註

萬目不張舉其綱衆毛不整振其領

魏志崔
林傳

治國之體其猶治家主田野者皆宜良信又宜得一人

總其條目作為維綱衆事乃理

吳志樓
玄傳

舉綱提綱振裘持領綱領既理毛目自張然則道德綱
也物勢目也上理其綱則萬機時序下張其目則庶官

不曠

南齊書
顧歡傳

軌守其數准乎其流動於未形而守事已成

管子山
權數

儀者萬物之程式也法度者萬民之儀表也禮義者尊

卑之儀表也

管子形勢解

取人以已成事以質

音質竹器所以量物

成事以質者用稱量也

取人以已者度恕而行也

管子版法解

尺寸尋丈者所以得短長之情也故以尺寸量長短則

萬舉而萬不失矣是故尺寸之度雖富貴衆強不為益

長雖貧賤卑辱不為損短公平而無所偏故姦詐之人

不能誤也

管子明法解

不出戶知天下不窺牖見天道其出彌遠其知彌少是

以聖人不行而知

老子鑒遠

夫債少易償也職寡易守也任輕易勸也上操約少之

分下效易為之功是以君臣久而不相厭也

文子下德

為而無害成而不敗一人唱而萬人和如體之從心此

政之期也蓋母錦杠悉動者其要在一也

鵠冠子天則

黃帝將見大隗乎具茨之山方明為御昌寓騂乘張若謂朋前馬昆閭滑稽後車至於襄城之野七聖皆迷無所問塗適遇牧馬童子問塗焉曰若知具茨之山乎曰

然若知大隗之所存乎曰然黃帝曰異哉小童非徒知具茨之山又知大隗之所存請問為天下小童辭黃帝又問小童曰夫為天下者亦奚以異乎牧馬者哉亦去其害焉者而已矣

莊子徐無鬼

上之所以使下者一物也下之所以事上者一術也辟之異者有高牆深宮牆立既謹上為鑿一門有盜人入闖其自入而求之盜其無自出是其故何也則上得要也

墨子尚賢上

今夫飛蓬遇飄而行千里乘風之勢也深淵者知千仞之深繩之數也故託其勢者雖遠必至守其數者雖深

必得

商子
禁使

主道治近不治遠治明不治幽治一不治二主能治近則遠者理主能治明則幽者化主能當一則百事正夫兼聽天下日有餘而治不足者如此也是治之極也既能治近又務治遠既能治明又務見幽既能當一又務正百是過者也猶不及也辟之是猶立直木而求其影

之枉也不能治近又務治遠不能察明又務見幽不能當一又務正百是悖者也辟之是猶立柱木而求其影之直也故明主好要而闇主好詳

荀子
王霸

君子審後王之道而論於百王之前若端拜而議推禮義之統分是非之分總天下之要治海內之衆若使人故操彌約而事彌大五寸之矩盡天下之方也故君子不下室堂而海內之情舉積此者則操術然也

荀子
不苟

將原先王本仁義則禮正其經緯蹊徑也若絜裘領趾

五指而頓之順者不可勝數也不道禮憲以詩書為之
譬之猶以指測河也以戈春黍也以錐飡壺也不可以

得之矣

荀子
勸學

有夫分義則容天下而治無分義則一妻一妾而亂

荀子

大畧
篇

書約而弟子辯法省而民訟簡是以聖人之書必著論
明主之法必詳事盡思慮揣得失智者之所難也無思
無慮絜前言而責後功愚者之所易也明主操愚者之

所易以責智者之所難故智慮力勞不用而國治也

韓非

子八

說

事在四方要在中央聖人執要四方來效

韓非子
楊權

救火者令吏挈壺甕而走火則一人之用也操鞭箠指麾而趣使人則制萬夫是以聖人不親細民明主不躬

小事

韓非子外
儲說右

茲鄭子引輦上高梁而不能支茲鄭踞輶而歌前者止後者趨輦乃上使茲鄭無術以致人則身雖絕力至死

輦猶不上也。今身不至勞苦而輦以上者，有術以致人

之故也。

韓非子外儲說右

造父方耨時有子，父乘車過者，馬驚而不行。其子下車牽馬，請造父助我推車。造父因收器輟而寄載之，援其子之乘，乃始檢轡持策，未之用也。而馬嚮驚矣。使造父而不能御，雖盡力勞身，助之推車，馬猶不肯行也。今身使佚且寄載有德於人者，有術而御之也。故國者，君之車也。勢者，君之馬也。無術以御之，身雖處勞，猶不免亂。

有術以御之身處佚樂之地又制帝王之功也

韓非子
外儲說

右

夫以身為苦而後化民者堯舜之所難也處勢而令下者庸主之所易也將治天下釋庸主之所易道堯舜之所難未可與為政也

韓非子
難一

譬之若御者反諸已則車輕馬利致遠復食而不倦

呂氏

春秋
論人

不通此者雖目數千羊之羣耳分八風之調足蹠陽阿

之舞而手會綠水之趨智終天地明照日月辯解連環

澤潤玉石猶無益於治天下也

淮南子
叔真訓

枝不得大於幹末不得強於本則輕重大小有以相制也若五指之屬於臂搏援攫捷莫不如志言以小屬於大也是故得勢之利者所持甚小其存甚大所守甚約所制甚廣是故十圍之木持千鈞之屋五寸之鍵制開闔之門豈其材之巨小足哉所居要也

淮南子
主術訓

處靜持中運於璇樞以一合萬若合符者也

淮南子
主術訓

夫寸生於稊，稊生於日，日生於形，形生於景，此度之本也。樂生於音，音生於律，律生於風，此聲之宗也。法生於義，義生於衆，適衆適合於人心，此治之要也。故通於本者，不亂於末；覩於要者，不惑於詳。

淮南子
主術訓

成國之道，工無僞事，農無遺力，士無隱行，官無失法，譬

若設網者，引其綱而萬目開矣。

淮南子
繆稱訓

得道則愚者有餘，失道則智者不足。渡水而無游數，雖強必沈；有游數，雖羸必遂。又況託於舟航之上乎？

淮南子
詮

言訓

治大者道不可以小地廣者制不可以狹位高者事不可以煩民衆者教不可以苛夫事碎難治也法煩難行也求多難贍也寸而度之至丈必差銖而稱之至石必過石秤丈量徑而寡失簡絲數米煩而不察故大較易為智曲辯難為慧故功不厭約事不厭省求不厭寡功約易成也事省易治也求寡易贍也衆易之於以任人

易矣

淮南子
泰族訓

或問大曰小問遠曰邇未達曰天下為大治之在道不

亦小乎四海為遠治之在心不亦邇乎

揚子孝至篇

因革國家之矩范也矩范之動成敗之效也

太玄經玄瑩

自上御下猶夫釣者焉隱於手應於鉤則可以得魚自
近御遠猶夫御馬焉和於手而調於銜則可以使馬故

至道之要不於身非道也

申鑒政體

登樹怪其枝不能動其株如伐株萬莖枯矣

王充論衡變動篇

夫組織之近成文於遠猶良御轡於手而調馬口以致

萬里也

呂氏春秋
先已解

射者望毫毛之近而中藝於遠也御者執轡於手調馬

口之和而致萬里

呂氏春秋
本味解

投一寸之鍼布一丸之艾於血脉之蹊篤病有瘳

王克
論衡

順故
篇

事有緣微而成著物有治近而致遠故修步武之池而
引沈鱗於江海豐朝陽之林而延靈禽於丹穴設象於
槃孟而翠虬降於玄霄委灰於尺水而望舒變於太極

是以晉文回輪於勇蟲而壯士雲赴句踐曲躬於怒鼃

而戎卒輕死

抱朴子外篇廣譬

舉一綱衆目張弛一機萬事隳

文中子
關朗

尸子曰文軒無四寸之鍵則車不行

李善註文選
枚叔七發

夫道上環中理貴持會希發而節樂者擊一杙之功也

一契而御衆者聖人之能也

李善註文選陸
士衡演連環

人主之行異布衣布衣者飾小行競小廉以自託於鄉

黨人主唯天下安社稷固不耳

補文選賈誼
請封建疏

秉綱而目自張執本而末自從

意林物
理論

舉綱以綱千目皆張振裘持領萬毛自整治大國者亦

當如此

意林
新論

三寸之篋運而天下定六寸之基正而天下治

意林
申子

聖人身猶日也夫日圓尺光盈天地聖人之身小其所

燭遠矣

太平御覽
天部三上

明君治國三寸之機運而天下定方寸之謀正而天下

治一言正而天下定一言倚而天下靡

太平御覽人
事部言語

寸管俯而陰陽效其誠尺表仰而日月與之期玄鳥懸

而八風以情應玉衡立而天地不能欺

初學記器用部漏刻註

治藏者治其俞治府者治其合浮腫者治其經

黃帝素問內經

效篇

我身者彼身之尺寸也我家者彼家之權衡也我鄉者

彼鄉之規矩也我國者彼國之準繩也人主者天下之

腹心也天下者人主之身形也

道德經指歸卷九

趨舍廢置王道之形聲也吉凶存亡趨舍之影響也

道德

經指歸

卷十二

衆必宗寡弱以扶強故以一轂之寡總諸輻之衆

道德經註

疏卷

一

若使折士執而用之立石為主刻木為君亦可以享天

下

陰符經集註
序諸葛亮

責公者易雖一賢少謬執難者衆雖九舜猶亂

初學記
帝王部

總叙

帝王

周公曰請問用矩之道商高曰平矩以正繩偃矩以望

高覆矩以測深卧矩以知遠環矩以為圓合矩以為方

玉海天文

天文書上

防萌

初六履霜堅冰至

易坤

六四童牛之牯元吉

易大畜

六五豮豕之牙吉

易大畜

緜緜不絕蔓蔓若何豪末不掇將成斧柯

沒冢周書和寤解

木之伐也而木為斧賊難而起者自近者

沒冢周書周祝解

如彼雨

去聲

雪先集維霰

音線○詩小雅頌升

誰生厲階至今為梗

詩大雅桑柔

予其懲而毖後患莫予荇

音

蜂自求辛螫音肇允彼桃

蟲拚

音翻

飛維鳥未堪家多難

去聲

予又集于蓼

音了○詩頌小毖

不如早為之所毋使滋蔓蔓難圖也蔓草猶不可除况

君之寵弟乎

左傳隱公元年

若不早圖後君噬臍

左傳莊公六年

人之有墻以蔽惡也墻之隙壞誰之咎也

左傳昭公元年

焰焰不滅炎炎若何涓涓不壅終為江河綿綿不絕或

成網羅毫末不扎將尋斧柯

孔子家語觀周

福生有基禍生有胎納其基絕其胎禍何自來

前漢書枚乘傳

夫十圍之木始生如蘗足可搔而絕手可擢而拔據其

未生先其未形也

前漢書枚乘傳

夫壞崖破巖之水源自涓涓干雲蔽日之材起於蔥青

禁微則易救末則難

後漢書丁鴻列傳

百尋之屋突直而焚燎千里之隄蟻蛭而穿敗古人防

小以全大慎微以杜萌

晉書陳
顯傳

堅冰之遘每鍾澆水

宋書二凶
元凶邵傳

夫人主不塞隙穴而勞力於赭堊暴雨疾風必壞不去
眉睫之禍而慕賁育之死不謹蕭牆之患而固金城於
遠境不用近賢之謀而外結萬乘之交於千里飄風一
旦起則賁育不及救而外交不及至禍莫大於此

韓非
子用

人

賢主謹小物以論好惡巨防容蟻而漂邑殺人突洩一

燥而焚宮燒積將失一令而軍破身死主過一言而國

殘名辱為後世笑

呂氏春秋慎小

善不可謂小而無益不善不可謂小而無傷夫牛之為胎也細若鼯鼠紂損天下自象箸始故小惡大惡一類

也

賈子新書連語

一家失燬百家皆燒讒夫陰謀百姓暴骸

淮南子說林訓

兩家鬪雞季氏金距邱公作難魯昭公出走故師之所處生以棘楚禍生而不蚤滅若火之得燥水之得濕浸

而益大癰疽發於指其痛遍於體故蠹啄剖梁柱蠹蝨

走牛羊此之謂也

淮南子
人間訓

衣缺不補則日以甚坊漏不塞則日以滋大河之始決

於瓠子也涓涓爾及其卒汜濫為中國害菑梁楚破曹

衛城郭壞沮洳積漂流百姓木棲千里無廬

鹽鐵論
中韓

夫百尋之室焚於分寸之颶千丈之波潰於一蟻之穴

何可不深防乎何可不改張乎而秉斤兩者或舍銓衡

而任情掌柯斧者或曲繩墨於附已

抱朴子外
篇百里

水久壞河山起咫尺尋木千丈始於毫末鑽燧之火勺
水所滅鵠卵未乎指掌之所靡及其乘衝颶而燎巨野
奮六羽以凌朝霞則雖智勇不能制也故明君治難於

其易去惡於其微

抱朴子外
篇用刑

牆之崩隕必因其隙劒之毀折皆由於壘尺矧穿堤能
漂一邑寸煙泄突致灰千室怨之始也微於隙壘及其
為害大於牆劒禍之所傷甚於邑室將防其萌急於水

火

劉子
慎隙

事皆從微至著不可不慎之於初所以尋木起於牙蘗

洪波出於涓泉

李善註文選東京賦

水所以載舟亦所以覆舟堅冰作於履霜尋木起於蘗

栽

文選東京賦

若風將至必先搖搖雖有聖人不能為謀也

廣文選周武王戶銘

盛不可不圖衰不可或忘隄潰蟻穴器漏箴亡

廣文選揚子雲

幽州收箴

裂風雖震不斷蔓草之根朽壤誠微遂實崇山之峭是

以一夫不懼威於赫怒千乘必致亡於巧笑

廣文選沈
休文連珠

交修

天地交而萬物通也上下交而其志同也

易泰

乃歌曰股肱喜哉元首起哉百工熙哉乃賡載歌曰元
首明哉股肱良哉庶事康哉又歌曰元首叢脞哉股肱

隋哉萬物墮哉

書益
稷

若作酒醴爾惟麴蘖若作和羹爾惟鹽梅

書說
命下

王省惟歲卿士惟月師尹惟日

書洪
範

地雖柔亦有剛克能出金石天為剛德亦有柔克不干

四時臣當執剛以正君君亦當執柔以納臣

孔氏傳
書洪範

地之德沈深而柔弱矣而有剛能出金石之物也天之

德高明剛強矣而有柔能順陰陽之氣也以喻臣道雖

柔當執剛以正君君道雖剛當執柔以納臣也

尚書正
義洪範

雞鳴思賢妃也哀公荒淫怠慢故陳賢妃貞女夙夜警

戒相成之道焉

毛詩
雞鳴

君明於上若日也臣察於下若月也

毛詩東
方註

華堂堂於上喻君也葉滑然於下喻臣也明王賢臣以德相承而治道興則讒諂遠矣

鄭氏箋詩
蒙震者華

言日以照晝月以照夜故得同曜齊明而照臨下土以興國君視外治夫人視內政當亦同德齊意以治理國

事

毛詩正
義日月

阪上有漆木隰中有栗木各得其宜以興秦仲之朝上

有賢君下有賢臣上下各得其宜

毛詩正
義車鄰

彼堂堂然光明者華也在於上又葉滑然而茂盛今在

於下華葉相與共成榮茂以興顯著者君也在於上美

德者臣也佐於下君臣相承共興國治

毛詩正義棠棠

君不尸小事臣不專大名

穀梁襄公十九年

殷王中宗非徒身自賢明亦有和羹之臣臣與其君可

否相濟如宰夫之和齊羹也

春秋正義昭公二十年

日月代明聖人以君臣代政

三墳形墳

昔吾先王體德聖明達於上帝譬如農夫作耦以刈殺

四方之蓬蒿以立名於荆此則大夫之力也

國語吳

今與陛下共理天下者外則公卿尚書內則常侍黃門
譬猶一門之內一家之事安則共其福慶危則通其禍

敗

後漢書李固列傳

夫陰陽和歲乃豐君臣同心化乃成也

後漢書第五倫傳

朝廷之士佐主成化猶人之有股肱心膂共為一體也

晉書庾

峻傳

臣譬列星景君配朝日暉事業並通濟功烈何巍巍

宋書

樂四

志

鼓鼗懷音待楊桴以振響天地涵靈資昏明以垂位是

以俊乂之臣借湯武而降英達之君假伊周而治

南齊書劉

祥傳

履端開物寔資元后代終成務諒惟宰棟

周書武帝上紀

辟惟元首庶黎惟趾股肱惟弼上下一體各勤攸司

周書

蘇綽

傳

為上唯周為下唯定周則天也定則地也或天或地大

禮乃成

太公六韜大禮

左操五音右執五味此言君臣之分也君出令佚故立于左臣任力勞故立于右夫五音不同聲而能調此言君之所出令無妄也而無所不順順而令行政成五味不同物而能和此言臣之所任力無妄也而無所不得得而力務財多

管子
宙合

寡人之有五子猶心之有四支心有四支故心得佚焉今寡人有五子故寡人得佚焉豈不可哉晏子對曰嬰聞之與君言異若乃心之有四支而心得佚焉可得令

四支無心十有八日不亦久乎

晏子春秋諫上

上下之道取類股肱比之一體其來尚矣故其相成也

如陰與陽其相形也猶圓與方

鬼谷子反應註

人主之患在莫之應故曰一手獨拍雖疾無聲人臣之

憂在不得一故曰右手畫圓左手畫方不能兩成故曰

至治之國君若桴臣若鼓技若車事若馬故人有餘力

易於應而技有餘巧易於事

韓非子功名

凡為人臣者猶炮宰和五味而進之君君弗食孰敢強

也臣請譬之君者壤地也臣者草木也必壤地美然後

草木碩大亦君之力也臣何力之有

韓非子
難二

人之百事如耳目鼻口之不可以相借官也

荀子君
道篇

四馬不調造父不能以致遠弓矢不調羿不能以必中

君臣乖心則孫子不能以應敵

淮南子
兵畧訓

君臣之禮若心之與體心不可以不堅君不可以不賢

體不可以不順臣不可以不忠心所以全者體之力也

君所以安者臣之功也

春秋繁露天
地之行章

子得罪於父可因姑姊妹謝也父乃赦之臣得罪於君可使左右謝也君乃赦之昔者桀得罪於臣也至今未

有為謝也

韓非子外傳

上下相虧也猶水火之相滅也

說苑君道

乘龍上天兩蛇為輔湧躍雲中遊觀滄海

焦氏易林乾之隨

初一日幽嬪之月冥隨之基測曰日嬪月隨臣應基也

太玄經

第二從

次六玄黃相迎其意感感測曰玄黃相迎以類應也

太玄

經第
四迎

君南面向陽著其聲響臣北面向陰見其形影聲響者

教令也形影者功效也

武侯十六策君臣

矢而自升羽之力也羽金朋合而後乃飛猶君臣同心

乃馳風化也

太玄經第二務解

天地相迎則風雨時調君臣相迎則政教以度

太玄經第四迎

解

君匪從流臣進逆耳

文選序

揖讓之與干戈文德之與武功莫不宗匠陶鈞而羣才

緝熙元首經畧而股肱肆力

文選袁宏
名臣序贊

君為元首臣為股肱明其一體相待而成

文選王子淵
四子講德論

臣敬治其職膺金石之別響君執契居中納鏗鏘之合

韻

文選陸士衡
演連珠註

台宿在天實承辰極股肱雖卑同體元首

藝文類聚帝
王部晉元帝

表

君垂冬日之溫臣盡秋霜之戒

藝文類聚職
官部冢宰碑

賢愚相奉臣主以成如彼百節各役天形

藝文類聚人部隱逸上箴

元首不可不思股肱不可不慈堯崇屢省舜盛欽謨

初學

記州郡部

淮南道

若無國王智臣耆舊如船無主旋洄覆沒

大方廣佛華嚴經卷十二

等則

天子諸侯下至黼黻大夫粉米兼服藻火是上得兼下也士不得服粉米大夫不得服黼黻是下不得僭上也

尚書正

義益稷

尊者食新農夫食陳

毛詩
甫田

國君尊嚴如南山崔崔然

毛詩南
山註

由絲以為綠則綠為末絲為本猶承嫡而使妾則妾為

卑而嫡為尊公定尊卑不可亂猶女治絲本末不可易

今公何為使妾上僭而令尊卑亂乎

毛詩正
義綠衣

以里垣之內始有樹木故以里喻親戚樹喻兄弟

毛詩
正義

將仲
子

夫設纓以為冠不得謂冠是纓之飾結組以懸佩不可

謂佩所以飾組

毛詩正義著

天有十日人有十等下所以事上上所以共神也

左傳昭公

七年

日中當王食時當公平旦為卿雞鳴為士夜半為皂人定為輿黃昏為隸日入為僚晡時為僕日昃為臺

詰氏解左

傳昭公

五年

位以王公卿為三日以中食旦為三

春秋正義昭公五年

大市日昃而市百族為主朝市朝時而市商賈為主夕

市夕時而市販夫販婦為主

周禮地官司市

弓長六尺有六寸謂之上制上士服之弓長六尺有三寸謂之中制中士服之弓長六尺謂之下制下士服之

周禮考

工記

禮天子之桷斲之礲之加密石焉諸侯之桷斲之礲之

大夫斲之士斲本

穀梁莊公二十四年

崇山君伏山臣列山民

三墳山墳

君象首臣象股民象體

三墳山墳

象君日象臣月象民星

三墳
山墳

崇高其山君之象也潛伏其山臣之象也山有行列民

之象也

三墳
山墳

首統方來君之象也臣象股肱以佐身也民為邦本如

肌體也

三墳
山墳

陛下用羣臣如積薪耳後來者居上

史記汲
鄭傳

天下之執方倒縣凡天子者天下之首何也上也蠻夷

者天下之足何也下也今匈奴嫚侮侵掠至不敬也為

天下患至已也而漢歲致金絮綵繒以奉之夷狄徵令是主上之操也天子共貢是臣下之禮也足反居上首顧居下倒縣如此莫之能解猶為國有人乎非亶倒縣而已又類辟且病痲夫辟者一面病痲者一方痛

前漢

書貢
誼傳

日者陽精守實不虧君之象也月者陰精盈毀有常臣

之表也

後漢書
丁鴻傳

若太陽下同萬物蒼生何由仰照

晉書王
導傳

帝皇正坐於紫宮輔臣列位於文昌垣屏駱驛而珠連

三台差池而鴈翔

晉書成公綏傳

彼鄒滕雉犇而出其地猶稱公侯

晏子問上

先王之法立天子不使諸侯疑焉立諸侯不使大夫疑

焉立適子不使庶孽疑焉疑生爭爭生亂是故諸侯失

位則天下亂大夫無等則朝廷亂妻妾不分則家室亂

適孽無別則宗族亂

呂氏春秋慎勢

衣服疑者是謂爭先厚澤者是謂爭賞權力疑者是

謂爭彊

賈子新書服疑

人主之尊辟無異堂陛九級者堂高大幾六尺矣若堂無陛級者堂高殆不過尺矣天子如堂羣臣如陛衆庶如地此其辟也故陛九級上廉遠地則堂高陛無級廉近地則堂卑高者難攀卑者易陵理勢然也

賈子新書階級

之耳

賈子等齊

此之不行沐瀆無界

賈子等齊

水廣者魚大父尊者子貴傳曰河海潤千里盛德及四海況之妻子乎故夫貴於朝妻貴於室富曰苟美古之道也孟子曰王子與人同而如彼者居使然也居編戶之列而望卿相之子孫是以跛夫之欲及樓季也無錢而欲千金之寶不亦虛望哉

鹽鐵論
刺權

冠雖敗宜加之首履雖全宜踐之足

太玄經第
四禮解

王者賜先親近後踈遠何法法天雨高者先得之也

白虎

通五行

天子佩白玉諸侯佩山玄玉大夫佩水蒼玉士佩端珉
石佩即象其事若農夫佩其耒耜工匠佩其斧斤婦人

佩其鍼鏤

白虎通
衣裳

假令廝養暴登卿尹則監門之類蔑而遺之

嵇中散集
答難養生

論

趙簡子謂左右曰車席泰美夫冠雖惡必戴之履雖善

必履之今車如此其大美也吾將何以履之

藝文類聚
服飾部薦

席

孔子侍坐於魯哀公設桃具黍哀公曰請用仲尼先飯
黍而後噉桃左右皆掩口失笑公曰黍者非飯之也以
雪桃也仲尼對曰丘知之矣夫黍者五穀之長也祭先
王以為上盛果有六而桃為下祭先王不得入於廟丘
聞之也君子以賤雪貴不聞以貴雪賤今以五穀之長
雪果蓏之下是侵上忽下也

事文類聚
穀韓子

名分不定而欲天下之治也是猶欲無饑而去食欲無
寒而去衣也欲至東而西行其不幾亦明矣

太平御覽
刑法部律

令科
附

今下僭其上尊卑無別如使雞鶩蛇頸龜身五色紛麗

亦可貴於鳳乎

太平御覽
羽族部鶩

高莫高於天下莫下於澤天高澤下聖人法之

太平御覽
地部

澤

珽無所屈天子見諸侯見卿大夫之笏也大圭椎其上

猶諸侯荼前屈後直見天地見先王之笏也

玉海
器用圭璧

上品君中復各有貴賤譬如列國諸侯雖並得稱制而

猶歸宗周臣佐之中亦當如此

本草
一卷

喻林卷一百

欽定四庫全書

喻林卷一百一

明 徐元太 撰

政治門 六

均調

玉鉉在上剛柔節也

易鼎

有兔無所拘制爰爰然而緩有雉離於羅網之中而急此二者緩急之不均以喻王之為政有所聽縱者則緩有所躁蹙者則急此言王為政用心之不均也

毛詩正義 兔爰

山既高峻又以草木平滿其傍倚之畛谷使之齊均以興尹氏既為尊顯亦當以政教養育其天下民庶使之

齊均

毛詩正義
節南山

弓一時須張一時須弛喻民一時須勞一時須逸勞逸相參若調之以道化之以理張弛以時

禮記正義
雜記下

不易之地家百畝一易之地家二百畝再易之地家三

百畝

周禮地官
大司徒

柞氏掌攻草木及林麓夏日至令刊陽木而火之冬日

至令剝陰木而水之若欲其化也則春秋變其水火

周禮

秋官
柞氏

冬獻狼夏獻麋狼膏聚麋膏散聚則溫散則涼以救時

之苦也

鄭氏註周禮
天官獸人

凡和春多酸夏多苦秋多辛冬多醢調以滑甘各尚其

時味而甘以成之猶水火金木之載於土

鄭氏註周禮
天官食醫

病由氣勝負而生攻其贏養其不足者五味五穀五藥

也

鄭氏註周禮
天官疾醫

不易之地歲種之地美故家百畝一易之地休一歲乃復種也薄故家二百畝再易之地休二歲乃復種故家

三百畝

鄭氏註周禮地官大司徒

陽木生山南者陰木生山北者冬斬陽夏斬陰堅濡調

鄭氏註周禮

地官山虞

神久用則竭形太勞則敝不可以久勞也神不用則鈍形不用則痿不可以久逸也固當勞逸更遞以宣散其

氣

春秋正義昭公元年

土氣和而物生之國家和而民附之若以水盆水盡乃

棄之無所成也

國語解鄭史伯對桓公

夫為政猶張琴瑟大絃急者小絃絕

後漢書陳寵列傳

夫熊經鳥伸雖延歷之術非傷寒之理呼吸吐納雖度

紀之道非續骨之膏蓋為國之法有似理身平則致養

疾則攻焉夫刑罰者治亂之藥石也德教者興平之梁

肉也夫以德教除殘是以梁肉理疾也以刑罰理平是

以藥石供養也

後漢書崔寔列傳

夫統天下之重如臣乘惡馬而持矛也急之則慮自傷

緩之則懼其失是以馬馳而不制也

晉書李雄傳

善御者必識六轡盈縮之勢善政者必審官方控帶之

宜

晉書張華傳

式張琴瑟且調宮羽

魏書竇瑗良吏傳

琴瑟在於必和更張求其適調

魏書蕭寶寅傳

天有陰陽風雨晦明之氣人有喜怒哀樂好惡之情節

而行之則和平調理專壹其情則溺而生疾

隋書經籍三志

造父善馭馬者也善視其馬節其飲食度量馬力審其
足走故能取遠道而馬不罷明主猶造父也善治其民
度量其力審其技能故立功而民不困傷故術者造父
之所以取遠道也主之所以立功名也

管子形
勢解

其冬厚則夏熱其陽厚則陰寒故知虛滿之所在以為

正令已

管子
侈靡

譬猶師曠之調五音也所推形上下無常尺寸以度而
靡不中者故通於樂之情者能作音有本主於中而知

規矩鈎繩之所用者能治人

文子上禮

天地之間若虛而實人常漸是澹澹之中而以治亂之氣與之流通相穀饌也故人氣調和而天地之化美穀

於惡而味敗

春秋繁露
如天之為

扁鵲撫息脉而知疾所由生陽氣盛則損乏而調陰寒氣勝則損乏而調陽是以氣脉調和而邪氣無所留矣夫拙醫不知脉理之膝血氣之分妄刺而無益於疾傷肌膚而已矣今欲損有餘補不足富者益富貧者益貧

矣嚴法任刑欲以禁暴止姦而姦猶不止意者非扁鵲

之用鍼石故衆人未得其職也

鹽鐵論
輕重

甄陶天下者其在和乎剛則甄柔則坯龍之潛亢不獲
其中矣是以過中則惕不及中則躍其近於中乎聖人
之道譬猶日之中矣不及則未過則吳

揚子
先知

竈陰雖沃而灑之陽猶執而餅之

太玄經
第四竈

且扁鵲之治病也審閉結而通用虛者補之實者瀉之
故病愈自名顯伊尹之佐湯也設輕重而通有無損積

餘以補不足故殷治而君尊

潛夫論
實邊

琴瑟絃有數急柱有前却故調事亦如之也

淮南子
論訓解

釀酒於罌烹肉於鼎皆欲其氣味調得也時或鹹苦酸

淡不應口者猶人勺藥失其和也夫政治之有災異也

猶烹釀之有惡味也

王充論衡
譴告篇

狄牙之調味也酸則沃之以水淡則加之以鹹水火相

變易故膳無鹹淡之失也今刑罰失實不為異氣以變

其過而又為寒於寒為溫於溫此猶憎酸而沃之以鹹

惡淡而灌之以水也

王充論衡
譴告篇

寒溫之疾非藥不愈黍谷之氣非律不調

王充論衡
寒溫篇

今燠薪燃釜火猛則湯熱火微則湯冷夫政猶火寒溫

猶熱冷也

王充論衡
寒溫篇

夫德不可獨任以治國力不可直任以御敵也韓子之

術不養德偃王之操不任力二者偏駁各有不足偃王

有無力之禍知韓子必有無德之患

王充論衡
非韓篇

宰和得節美味渝時而不敗

太玄經第
四竈解

政之於人猶琴瑟也大絃急則小絃絕小絃絕大絃間

矣

劉子
愛民

陰陽調天地和也剛柔均人之和也陰陽不和則水旱

失節剛柔不均則強懦乖政水旱失節則歲敗強弱乖

政則身亡

劉子
和性

夫陶者失剛柔之和則不成器為政失寬猛之中則不

成治

揚子法言
註先知篇

枹鼓希聲以諧金石之和鼙鼓踈擊以節繁絃之契是

以經治必宣其通圖物恒審其會

文選陸機
演連珠

且濟時拯世之術豈必體堯蹈舜然後乃理哉期於補
綻決壞枝柱邪傾隨形裁割要措斯世於安寧之域而

已

廣文選崔
子真政論

夫金木水火以剛柔相濟然後克得其和能為民用若
使金與金相迤火與火相爛則焦然摧折俱不得其所

也

廣文選王仲宣為
劉表與袁尚書書

聖人制民也如高下制水如燥濕制火

意林商
君書

春風暢物秋霜肅殺同則相濟異若胡越

藝文類聚刑法部刑賦

周失之舒秦失之急故周衰無寒歲秦末無燠年

事文類聚

水

高山之巔無樹深海之淵無冰剛太燥溫太柔也

太平御覽

地部

猶如和羹調食魚肉葱豉各有所宜共相宣發也

本草

藥有君臣佐使以相宣攝合和宜用一君二臣三佐五

使又可一君三臣九佐使也

本草一卷

凡陰陽之要陽密乃固兩者不和若春無秋若冬無夏

因而和之是謂聖度

黃帝素問內經
生氣通天論

岐伯曰必先度其形之肥瘦以調其氣之虛實實則瀉之虛則補之必先去其血脈而後調之無問其病以平

為期

黃帝素問內經
三部九候論

邪氣反勝治之柰何岐伯曰風司于地清反勝之治以酸溫佐以苦甘以辛平之熱司于地寒反勝之治以甘熱佐以苦辛以鹹平之濕司于地熱反勝之治以苦冷

佐以鹹甘以苦平之火司于地寒反勝之治以甘熱佐以苦辛以鹹平之燥司于地熱反勝之治以平寒佐以苦甘以酸平之以和為利寒司于地熱反勝之治以鹹冷佐以甘辛以苦平之

黃帝素問內經至真要大論篇

脉急者尺之皮膚亦急脉緩者尺之皮膚亦緩脉小者尺之皮膚亦減而少氣脉大者尺之皮膚亦貴而起脉滑者尺之皮膚亦滑脉濇者尺之皮膚亦濇凡此變者有微有甚故善調尺者不待於寸善調脉者不待於色

能參合而行之者可以為上工上工十全九行二者為

中工中工十全七行一者為下工下工十全六

黃帝素問靈樞

經邪氣藏

府病形

高者抑之下者舉之有餘者折之不足者補之佐以所利和以所宜必安其主客適其寒溫同者逆之異者從

之

黃帝素問內經至真要大論篇

治諸勝復寒者熱之熱者寒之溫者清之清者溫之散者收之抑者散之燥者潤之急者緩之堅者柔之脆者

堅之衰者補之强者瀉之各安其氣必清必靜則病氣

衰去歸其所宗此治之大體也

黃帝素問內經
至真要大論篇

夫弓人之為弓也既煞既生既翕既張制以規矩督以

準繩弦高急者寬而緩之弦弛下者攝而上之其有餘

者削而損之其不足者補而益之弦質相任上下相權

平正為主調和為常故弓可桴而矢可行也

道德經指
歸卷十三

夫冬溫夏涼不失四時之和所以適身也

養性延命
錄教誡篇

譬如車一輪強一輪弱則不安穩

大智度論
卷十七

譬如服藥少則病不除多則增其患應病投藥令不增

減則能愈病

大智度論
卷三十一

譬如乘馬疾則制之遲則鞭之

大智度論
卷三十五

漸舉

若升高必自下若陟遐必自邇

書太
甲下

善政有漸如登高升遠必用下近為始然後終致高遠

孔氏傳書

太甲下政

月上弦而就盈日始出而就明

鄭氏箋
詩天保

以罔咎喻為政張之為綱理之為紀

鄭氏箋
詩棧模

農夫種苗既畢勤力耘鋤去草養苗則苗善矣聖王以

善道教民既畢又須講說學習以勸課之存是去非則

善也

禮記正
義禮運

覆簣創元天之基䟽涓開環海之宅彼既有漸此亦同

符

晉書武昭
王列傳

合抱之木生於毫末九層之臺起於累土千里之行始

於足下

老子
守微

十圍之木始於把百仞之臺始於下此天之道也聖人

法之

文子
道德

長梧封人問子牢曰君為政焉勿鹵莽治民焉勿滅裂
昔予為禾耕而鹵莽之則其實亦鹵莽而報予芸而滅
裂之其實亦滅裂而報予予來年變齊深其耕而熟穫
之其禾繁以滋予終年厭饕莊子聞之曰今人之治其
形理其心多有似封人之所謂

莊子
則陽

財物貨寶以大為重政教功名反是能積微者速成

荀子

強國

糟糠不飽者不務梁肉短褐不完者不待文繡夫治世之事急者不得則緩者非所務也

韓非子五蠹

次五從水之科滿測曰從水滿科不自越也

太玄經第二從

且夫治世者若登丘矣必先躡其卑者然後乃得履其高是故先致治國然後三王之政乃可施也道齊三王然後五帝之化乃可行也道齊五帝然後三皇之道乃

可從也

潛夫論衰刑

譬如白月初出漸明至十五日光明圓滿流照十方亦如海潮月初漸起至十五日大起潮波洄瀉萬里法王政化亦復如是

大方廣佛華嚴經卷十二

寬大

雷雨作解君子以赦過宥罪

易解

古者刑不上大夫蓋以為摘巢毀卵則鳳凰不翔刳胎焚夭則麒麟不至刑之則恐誤刑賢者死者不可復生刑者不可復屬故有罪放之而已所以尊賢者之類也

何休解公羊
宣公元年

鞭朴之子不從父之教刑戮之民不從君之政言疾之

難行故君子不急斷不意使以為亂源

孔子集
語上

漢興破觚而為圜斲雕而為朴網漏於吞舟之魚而吏

治蒸蒸不至於姦黎民艾安

史記酷
吏傳

昔韓盧之眈菟也上觀下獲不甚多殺願次卿少緩誅

罰思行此術

前漢書
酷吏傳

備曰今指與吾為水火者曹操也操以急吾以寬操以

暴吾以仁操以譎吾以忠

蜀志龐統傳註

御之良者不在於煩策政之善者無取於嚴刑

隋書史臣酷吏

傳

夫以璵璠之珎而棄其璞以一人之罪而兼其衆則天

下無美寶信士也

鹽鐵論晁錯

霜雪晚至五穀猶成電霧夏隕萬物皆傷由此觀之嚴

刑以治國猶任秋冬以成穀也

鹽鐵論論菑

治民者若大匠之斲斧斤而行之中繩則止

鹽鐵論大論

高牆狹基不可立矣嚴法峻刑不可久也

鹽鐵論
詔聖

聞為國忠信以損怨不聞作威以防怨譬之若防川也大決所犯傷人必多吾不能救也不如小決之使導吾

聞而樂之也

新序雜
事四

譬之野獸蹴之窮地意急情盡則和聲不至而氣息不理第然暴怒但生疣疵以對之也夫寬以容物物必歸

焉

郭子註莊
人間世

傷秋荼之密網惻夏日之嚴威永念畫冠緬追刑厝

文選

王融策
秀才文

貴平

節彼南山有實其猗

音

赫赫師尹不平謂何

詩小雅
節南山

戎車之安從後視之如執從前視之如軒然後適調也

鄭氏箋
詩六月

鳴鳩之鳥在桑其子飛去在梅以其平均養之故得長大而飛去以興人君之德亦能均壹養民養民得成就

而安樂

毛詩正
義鳴鳩

鳴鳩之鳥在於桑木之上為巢而其子有七兮鳴鳩養之能平均用心如壹以興人君之德養其國人亦當平

均如壹

毛詩正義
鳴鳩

壘大似富衆餅小似貧寡然壘餅並列俱以酌之則當多酌壘而少酌餅以至於俱盡是均也猶上之賦役亦富貧並對俱以役之則當多役富而少役貧以至於俱堪亦為均也

毛詩正義
衆義

壘器大餅器小酌酒者當多酌壘少酌餅不使小餅先

竭今餅之既盡矣而異尚盈滿是為酌粟者之恥也以
興民有富而多丁貧而寡弱治民者當多役富少役貧
不使貧者先困今貧者既困矣而富者尚饒裕是王之

恥也

毛詩正義
義莖莖

周之貢賦之道其均如砥石然周之賞罰之制其直如

箭矢然是所行之政皆平而不曲也

毛詩正義
義大東

凡相敵歛錢飲酒必非忘懷之酌得而遽飲必令平偏

不偏頗與周禮次序旅酬相似也

禮記正義
義禮器

臨官莫如平臨財莫如廉

孔子集語上

理有一準則民無覲覲法啓二門則吏多威福

魏書出帝紀

天下之所以平者政平也政之所以平者人平也人之

所以平者心平也夫平猶權衡然加銖兩則移矣載其

所不欲其為銖兩者倍矣

子華子北宮子仕

夫投鈞以分財投策以分馬非鈞策為均也使得美者不知所以美使得惡者不知所以惡此所以塞願望也

慎子威德

善為吏者樹德不能為吏者樹怨槩者平量者也吏者

平法者也治國者不可失平也

韓非子外
儲說左

聖人執一政以繩百姓持一槩以等萬民

陸子
懷慮

夫繩之為度也可卷而伸也引而伸之可直而晞故聖人

以身體之夫修而不橫短而不窮直而不剛久而不忘者

其惟繩乎故恩推則懦懦則不威嚴推則猛猛則不和

愛推則縱縱則不令刑推則虐虐則無親

淮南子記
論訓上

循理守常曰道臨危制變曰權權之為稱譬猶權衡也

衡者測邪正之形權者揆輕重之勢量有輕重則形之於衡令加一環於衡左則右蹶加之於右則左蹶唯莫之動則平正矣人之於事臨宜制變量有輕重平則行之亦猶此也

劉子明權

里中社平為之宰分肉食甚均里父老曰善陳孺子之為宰平曰嗟乎使平得宰天下亦如此肉矣

藝文類聚禮部社稷

五雀六鷺飛集衡衡適平一雀一鷺飛而易處則雀重

而鷺輕

藝文類聚鳥部鷺

聖人之治民也如高下制水如燥濕制火也

太平御覽
人事部叙

天下所以平者政平也政所以平者心平也心所以平

者衡平也衡所以平者銖兩平也銖兩所以平者毫釐

平也無所不均也無所不平也謂之太平

太平御覽人
事部公平

吾心如秤不能為人作輕重

太平御覽
人事部心

邑中人民俱出獵任安常為人分麋鹿雉兔部署老小

當壯劇易處衆人皆喜曰無傷也任少卿分別平

太平
御覽

獸部
鹿

帝曰善平氣何如岐伯曰謹察陰陽所在而調之以平

為期正者正治反者反治

黃帝素問內經
至真要大論篇

譬如長者六子幼稚並皆愛念無偏黨心長者在外其宅火起於其六子先後救不不也其父於子心平等故

波羅蜜多經卷

五百六十八

又如坑坎之處水悉平等

勝天王波
羅蜜經

執御斯心平等恒一如地水火風無有憎愛

阿差末菩
薩經卷一

喻如秤物隨重頭下其物若輕少便即頭高物若均平

其秤亦平

蕪婆呼童
子經卷上

譬如三種藥對治風冷熱藥不擇種姓貴賤皆能治

大莊

嚴經論
卷八

明刑

天地以順動故日月不過而四時不忒聖人以順動則

刑罰清而民服

易豫

動而明雷電合而章

易噬
嗑

雷電噬嗑先王以明罰勅法

易噬嗑

六二噬膚滅鼻

易噬嗑

六三噬腊肉遇毒

易噬嗑

九四噬乾肉得黃金貞厲无咎

易噬嗑

山下有火賁君子以明庶政无敢折獄

易賁

雷電皆至豐君子以折獄致刑

易豐

山上有火旅君子以明慎用刑而不留獄

易旅

澤上有風中孚君子以議獄緩死

易中孚

刑人不服若齧其腊肉非但難齧亦更生怨咎猶噬腊

而難入復遇其毒味然也

周易正義噬嗑

刑罰之所從生有源不務塞其源而務刑殺之是為民

設陷以賊之也

大戴禮記盛德

鷹祭鳥之後殺鳥不必盡食猶若人君行刑但戮之而

已

禮記正義月令

牽牛以蹊人之田而奪之牛牽牛以蹊者信有罪矣而

奪之牛罰已重矣

左傳宣公十一年

人利其璧以璧為罪

杜氏解左傳
桓公十年

及陷於罪然後從而刑之是罔民也

孟子梁
惠王上

是方四十里為阱於國中

孟子梁
惠下

今有殺人者或問之曰人可殺與則將應之曰可彼如曰

孰可以殺之則將應之曰為士師則可以殺之

孟子公
孫丑下

設陷阱者不過丈尺之間耳今王陷阱乃方四十里

趙氏

註孟子梁

惠王上

善哉為吏其用法一也思仁恕則樹德加嚴暴則樹怨

公以行之其子羔乎

孔子家語致思

四馬方馳驚前者斬其數必正若是越難成矣

越絕請雜內傳

驚棺者欲歲之疫非憎人欲殺之利在於人死也今治

獄吏欲陷害人亦猶此矣

前漢書刑法傳

時天旱禁酒釀者有刑吏於人家索得釀具論者欲令

與作酒者同罰雍與先主游觀見一男女行道謂先主

曰彼人欲行淫何以不縛先主曰卿何以知之雍對曰

彼有其具與欲釀者同先主大笑而原欲釀者

蜀志簡雍傳

亡者則足無所用復亡盜者截手無所用復盜淫者割

其勢理亦如之除惡塞源莫善於此

晉書刑法志

采其根牙之微致之於機格之上稱輕重於豪銖考輩

類於參伍然後乃可以理直刑正

晉書刑法志

今所注皆網羅法意格之以名分使用之者執名例以

審趣舍伸繩墨之直去析薪之理也

晉書杜預傳

剪韭復生寧失有罪抱木牢戶未必非寬

南齊書孔稚圭傳史臣

乃遣聽已暴之辜替網觸羅之鳥

南齊書劉休傳

雖事異鑽皮文非刺骨猶復因茲舌杪成此筆端

梁書王僧孺傳

惟王建國刑以助禮猶寒暑之贊陰陽山川之通天地

北齊書文苑李廣傳

聖人仰視法星旁觀習坎彌縫五氣取則四時莫不先

春風以播恩後秋霜而動憲

隋書刑法志

凡赦者小利而大害者也故久而不勝其禍母赦者小
害而大利者也故久而不勝其福故赦者犇馬之委轡

母赦者座睢之礦石也

管子法法

前林

不以私恚害公法不為禽獸傷人民不為草木傷禽獸

不為野草傷禾苗

晏子春秋諫下

夫代司殺者是謂代大匠斲夫代大匠斲者希有不傷

手者矣

老子制感

事敗而弗誅則游說之士孰不為用矰繳之說而激倖

其後

韓非子五蠹

且夫以法行刑而君為之流涕此以效仁非以為治也

夫垂涕不欲刑者仁也然而不可不刑者法也先王勝

其法不聽其泣則仁之不可以為治亦明矣

韓非子
五蠹

天道至明司殺者常猶春生夏長秋收冬藏斗杓運移以節度行之人君欲代殺之是猶拙夫代大匠斲木勞

而無功也

河上公註
老子制惑

人君行刑罰猶拙人代大匠斲則方圓不得其理還自

傷代天殺者失紀綱不得紀綱還受其殃也

河上公註
老子制惑

所以貴扁鵲者非貴其隨病而調藥貴其摩息脉血知病之所從生也所以貴聖人者非貴隨罪而鑒刑也貴

其知亂之所由起也

淮南子
恭族訓

天之志常直陰空處稍取之以為助故刑者德之輔陰

者陽之助也陽者歲之主也

春秋繁露
天辯在人

一人有罪州里驚駭十家奔亡若癰疽之相澗色淫之

相連一節動而百枝搖

鹽鐵論
申韓

罷馬不畏鞭箠罷民不畏刑法雖曾而累之其亡益乎

鹽鐵論

詔聖

今以子誅父以弟誅兄親戚小坐什伍相連若引根本

之及華葉傷小指之累四體也

鹽鐵論
周秦

人君不畜惡民農夫不畜無用之苗無用之苗苗之害也無用之民民之賊也鉏一害而衆苗成刑一惡而萬民悅雖周公孔子不能釋刑而用惡家之有鉏子器皿不居况鉏民乎民者教於愛而聽刑故刑所以正民鉏

所以別苗也

鹽鐵論
後刑

夫不傷民之不治而伐己之能得姦猶弋者覩鳥獸挂爵羅而喜也今天下之被誅者不必有管蔡之邪鄧析

之偽恐苗盡而不別民欺而不治也

鹽鐵論
後刑

民陷於罔從而獵之以刑是猶開其關牢發以毒矢也

不盡不止

鹽鐵論
後刑

刑之於治猶策之於御也良工不能無策而御有策而

勿用聖人假法以成教教成而刑不施

鹽鐵論
後刑

有司法之若救爛撲焦不能禁非

鹽鐵論
刑德

網疏則獸笑法疏則罪漏罪漏則民放佚而輕犯禁故

禁下必法

鹽鐵論
刑德

執法者國之轡銜刑罰者國之維繫故轡銜不飭雖王

良不能以致遠維繫不設雖良工不能以絕水鹽鐵論刑德

父不能愛無益之子君不能愛不軌之民說苑談叢

次七金剛內柔血流於田測曰金剛內柔法太傷也太玄經第三疆

次五大腹決其股脫君子有斷小人以活測曰大腹決

脫斷得理也太玄經第三斷

司馬法曰小罪朕中罪則大罪到許氏說文卷五

今有酒徒十人羣居而飲有客請曰今日之飲毋隱厥

技以為劇可乎其一人進曰吾善於簫有二人曰吾善於歌又有二人曰吾善於舞二人善於奕二人善於壺客曰若之藝咸聽士酒謂簫者曰吾忽焉舉觴而簫不應者罰忽焉投觴而簫不節者罰頃之簫者醉而不能罰矣又謂歌者曰吾忽焉舉觴而歌不應者罰忽焉投觴而歌不節者罰頃之歌者又醉而不能罰矣至於舞者亦然奕者壺者亦然客笑而喜曰吾一觴而困九人其亦善罰矣乎何取於藝也九人曰何子之能忽於罰而

不能忽於賞也無亦罰吾以酒而罰予以名乎夫酒可以罰可以賞是酒不為厲也人猶惡醉而辱之今有司罰人以錢穀刑人以刀鋸是猶簫既罰而斷其指歌不賞而鉗其唇不亦甚乎

天祿閣外史五難

且刑猶刃也巧人以自成拙者以自傷亦猶水火者所以活人亦所以殺人存乎能用之與不能用

抱朴子外篇用刑

夫匠石不舍繩墨故無不直之木明主不廢戮罰故無

陵遲之政也

抱朴子外篇用刑

誅一以振萬損少以成多方之櫛髮則所利者衆比於
割疽則所全者大是以灸刺慘痛而不可止者以痊病
也刑法凶醜而不可罷者以救弊也

抱朴子外
篇用刑

律者中也黃鍾調起五音以正法律馭民八刑克平以

律為名取中正也

文心雕
龍書記

昔王良之善御也識馬之饑飽規矩徐疾之節故鞭策
不載而千里可期然不可以無鞭策者以馬之有佚也
聖人之為治也以爵賞勸善以仁化養民故刑罰不用

太平可致然而不可廢刑罰者以民之有縱也

劉子賞罰

猛虎在深山百獸震恐及在檻穽之中搖尾而求食積威約之漸也故有畫地為牢執不可入削木為吏議不

可對定計於鮮也

文選司馬遷報任少卿書

先王制禮以崇敬作刑以明威刑罰威獄以類天之震

曜殺戮也

玉海刑制

號令不時命曰傷天焚林斬木不時命曰傷地斷獄立

刑不當命曰傷人

意林晁錯新書

今有弱子當陷大辟問其慈父必乞以肉刑代之苟可
以生易死也有道之君能不以此加百姓乎蛇螫在手
壯夫斷其腕謂其雖斷不死也

意林物
理論

曹義曰繫馴駒以絛絆御悍馬以腐索今制民以輕刑

亦如死也

意林物
理論

救嬰孩之疾而不忍鍼艾更加他物以致死也今除肉

刑者更衆何異服他藥也

意林物
理論

太公東封齊齊東海上有居士曰狂獼華士昆弟三人

立議曰上不臣天子下不事諸侯耕作而食掘井而飲
無吾求上太公至營丘使執而殺之周公聞發急傳問
之太公荅曰今有馬如驥之狀天下至良也驅之不前
引之不至左之不左右之不右賢士而不為王用猶驥
之不可以左右是以誅之

太平御覽
刑法部誅

車輕道近則鞭策不用鞭策之所用遠道重任也刑罰

也者民之鞭策也

太平御覽刑
法部叙刑下

若親貴犯罪大者必議小者必赦是縱封豕於境內放


長蛇於左右也

太平御覽
刑法部赦

飄風苦雨溱溱而至此天之所以罰百姓不上同於闕

也

太平御覽
天部下



喻林卷一百一